



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

GRADSKO VIJEĆE

Broj: 01-GV-02-586/22
Sarajevo, 04.04.2022. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na 14. sjednici održanoj dana 04.04.2022. godine, usvojilo je

Izveštaj o provođenju Odluke o utvrđivanju i načinu sufinansiranja sportskih manifestacija od posebnog interesa za Grad Sarajevo u 2021. godini.

PREDSJEDAVALAČI GRADSKOG VIJEĆA

Jasmin Ademović, s.r.

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

IZVJEŠTAJ
O PROVOĐENJU ODLUKE O UTVRĐIVANJU I NAČINU SUFINANSIRANJA
SPORTSKIH MANIFESTACIJA OD POSEBNOG INTERESA
ZA GRAD SARAJEVO U 2021. GODINI

Sarajevo, april 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



I UVOD

Programom rada Gradskog vijeća Grada Sarajeva za 2022. godinu predviđeno je razmatranje Izvještaja o provođenju Odluke o utvrđivanju i načinu sufinansiranja sportskih manifestacija od posebnog interesa za Grad Sarajevo u 2021. godini.

II NAČIN FINANSIRANJA MANIFESTACIJA OD POSEBNOG INTERESA ZA GRAD SARAJEVO

Gradsko vijeće Grada Sarajeva donijelo je Odluku o utvrđivanju i načinu sufinansiranja sportskih manifestacija od posebnog interesa za Grad Sarajevo („Službene novine Kantona Sarajevo“, broj 10/19).

Istom su utvrđene sljedeće manifestacije od posebnog interesa za Grad Sarajevo:

- Memorijalni karate turnir „Kup oslobođenja – Salih Salko Ćurić“;
- Međunarodni memorijalni košarkaški turnir „Mirza Delibašić“;
- Međunarodni memorijalni turnir u dizanju tegova „Andrija Maleč“;
- Međunarodni memorijalni judo turnir „Vinko Šamarlić“;
- Međunarodni Šestoaprilski turnir u fudbalu U-15 „Josip Katalinski Škija“;
- Međunarodni turnir u ritmičkoj gimnastici „Suada Dilberović“;
- Međunarodni košarkaški turnir „Davorin Popović Dačo“;
- Memorijalni bokserski turnir „Braća Kadić“;
- Međunarodni memorijalni bokserski turnir „Mustafa Hajrulahović Talijan“;
- Međunarodni memorijalni judo turnir „Alija Miladin“;
- Međunarodni karate turnir Karate World Grand Prix „Alija Izetbegović“;
- Međunarodni teniski turnir za juniore-ke do 16 godina „Open RCT Barcelona 1899- Sarajevo“;
- Međunarodni velemajstorski šahovski super turnir „Bosna“ Sarajevo;
- Međunarodni turnir u sjedećoj odbojci „SARAJEVO OPEN“;
- Međunarodno skijaško takmičenje FIS Kup „Djeca za mir u svijetu“;
- Međunarodni turnir u hokeju na ledu „Sarajevo kids“;
- Evropski judo kup Top ranking;
- Međunarodno FIS takmičenje u snowboardu „Europa KUP Sarajevo“;
- Međunarodni plivački miting „Sarajevu s ljubavlju“;
- Međunarodni vaterpolo turnir „Sarajevo Champions Challenge“;
- Šestoaprilski turnir u hrvanju „Kup grada Sarajeva“;
- Međunarodni Šestoaprilski turnir u kuglanju za slijepce i slabovidne osobe;
- Međunarodni Šestoaprilski turnir u streljaštvu;
- Međunarodni Šestoaprilski turnir u košarci;
- Sarajevski polumaraton;
- Međunarodni fudbalski turnir U-17 „Igraj fudbal živi život“;
- Međunarodni skokovi u vodu „Bentbaša“;
- Šestoaprilski turnir u streljaštvu za invalide;
- Međunarodni plivački miting „Mladi za mlade“;
- Sportske igre mladih;
- Međunarodna gradska atletska trka „Viviccita“;
- Sportske igre Oaze

Odlukom o utvrđivanju i načinu sufinansiranja sportskih manifestacija od posebnog interesa za Grad Sarajevo definisani su opći i posebni kriteriji, kao i procedura za finansiranje navedenih manifestacija.

Organizatori manifestacija su dužni podnijeti gradonačelnici Grada Sarajeva putem Gradske službe za obrazovanje, sport, kulturu i mlade zahtjev za sufinansiranje manifestacije. Ovaj zahtjev mora sadržavati detaljan i obrazložen program sa svim aktivnostima, planiranu finansijsku konstrukciju programa, kao i kompletnu dokumentaciju kojom se dokazuje ispunjenje općih i posebnih kriterija, najkasnije do kraja septembra tekuće godine kako bi se mogla planirati sredstva u Budžetu Grada Sarajeva za narednu godinu.

Gradska služba za obrazovanje, sport, kulturu i mlade procjenjuje programe manifestacija sa stanovišta značaja za Grad Sarajevo i na osnovu općih i posebnih kriterija za finansiranje manifestacija te shodno kvaliteti programa svoje stavove sa obrazloženim prijedlogom visine iznosa sredstava neophodnih za realizaciju dostavlja gradonačelnici Grada Sarajeva na daljnji postupak.

Gradonačelnica Grada Sarajeva se obavezuje da sa organizatorima manifestacija zaključi ugovor kojim će se regulisati međusobna prava i obaveze.

Organizatori su dužni po završetku manifestacije dostaviti gradonačelnici Grada Sarajeva izvještaj o namjenskom utrošku sredstava shodno Odluci o izvršavanju Budžeta Grada Sarajeva.

III KRATAK OPIS SPORTSKIH MANIFESTACIJA OD POSEBNOG INTERESA ZA GRAD KOJE SU SUFINANSIRANE I REALIZOVANE U 2021. GODINI

U pogledu finansiranja programa iz oblasti sporta, iz skromnih budžetskih sredstava Grada Sarajeva u 2021. godini sufinansirano je ukupno devetnaest sportskih manifestacija. Jedan dio manifestacija nije održan zbog pandemije COVID-19, a najviše manifestacija je otkazano u sklopu Programa obilježavanja 6. aprila – Dana grada Sarajeva.

SPORTSKE MANIFESTACIJE

MEĐUNARODNI MEMORIJALNI JUDO TURNIR „VINKO ŠAMARLIĆ“

Termin: 11.09.2021 godine. Mjesto održavanja: Sportska dvorana „Goran Čengić“, Novo Sarajevo. Organizator: Judo klub „Željezničar“. Turnir se održava u znak sjećanja na heroja odbrane Sarajeva Vinka Šamarlića koji je poginuo 8. juna 1992. godine, nekoliko dana prije odlaska na Olimpijske igre u Barceloni. 29. Međunarodni memorijalni judo turnir „Vinko Šamarlić“ okupio je djecu uzrasta od šest do 18 godina iz cijelog regiona. Njih više od 300 borilo se za odličja. Turnir je i 2021. godine održan u nešto kasnijem terminu zbog pandemije COVID-19.

Za realizaciju manifestacije odobrena su sredstva iz Budžeta Grada Sarajeva u iznosu od 3.000,00 KM.

MEĐUNARODNI MEMORIJALNI TURNIR U DIZADNJU TEGOVA „ANDRIJA MALEČ“

Termin: 16.10.2021. godine. Mjesto održavanja: Hotel Malak, Ilidža. Organizator: Klub dizača tegova „Željezničar“ Sarajevo. Na turniru je nastupilo 53 takmičara iz 9 država (Bosna i Hercegovina, Albanija, Njemačka, Francuska, Jordan, Turska, Hrvatska, Holadnija i Kosovo). Turnir je održan uz sve mjere opreza i zaštite od COVID-19. Na turniru su učestvovali i osvajači medalja sa svjetskih, evropskih i azijskih prvenstava i takmičari i timovi sa dva kontinenta. Na održanom takmičenju, najvećem od kako je BiH član krovne organizacije IWF-a je postignuto i niz nacionalnih rekorda drugih država. Najuspješniji takmičar je bio Romain Imadoushene iz Francuske, koji je podigao čak 204 kg u disciplini „izbačaj“.

Za realizaciju manifestacije odobrena su sredstva iz Budžeta Grada Sarajeva u iznosu od 2.000,00 KM.

MEĐUNARODNI MEMORIJALNI BOKSERSKI TURNIR „MUSTAFA HAJRULAHOVIĆ TALIJAN“

Termin: 21.-27.09.2021. godine. Mjesto održavanja: Hotel Hills, Ilidža. Organizator: Bokserski klub „Zlatni ljiljani“. U Hotelu Hills, na Ilidži održan je XIX Međunarodni memorijalni bokserski turnir „Mustafa Hajrulahović Talijan“. Ovaj sportski događaj nosi ime u znak sjećanja na lik i djelo predsjednika BK „Zlatni ljiljani“ Mustafu Hajrulahovića Talijana, evocira uspomene i trajno podsjeća na heroja odbrane grada Sarajeva. Na turniru je učešće uzelo 17 reprezentacija sa 140 boksera i bokserki iz sedamnaest država.

Za najboljeg boksera turnira proglašen je Mario Manferdi iz Italije. Za najborbenijeg boksera turnira proglašen je Damian Durch iz Poljske. Najboji tehničar bio je Adam Hamori iz Mađarske, a najperspektivniji bokser turnira je Samuel Kistohuri iz Francuske.

Za realizaciju manifestacije odobrena su sredstva iz Budžeta Grada Sarajeva u iznosu od 3.000,00 KM.

MEĐUNARODNI TENISKI TURNIR ZA JUNIORKE I JUNIORE DO 16 GODINA „OPEN RCT BARCELONA 1899 – SARAJEVO 2021“

Termin: 15-21.08.2021. godine. Mjesto održavanja: Teniski tereni „Koševo“. Organizator: Teniski klub „Tenis Pro“. Ovogodišnji turnir je okupio 70 učesnika iz 27 zemalja, a održan je pod pokroviteljstvom Grada Sarajeva, Ministarstva kulture i sporta KS i Federalnog ministarstva kulture i sporta, kao i Općine Centar, koja je putem svoje Javne ustanove „Centar za sport i rekreaciju“, podržala turnir besplatno ustupivši korištenje teniskih terena. Teniski turnir „OPEN RCT Barcelona 1899-Sarajevo 2021“ je među dvanaest teniskih turnira u Europi za igrače i igračice do 16 godina starosti, sa statusom prve kategorije turnira. Pobjednik turnira u U16 kategoriji takmičara, je bosanskohercegovački reprezentativac Marko Maksimović, koji je u finalu pobijedio crnogorskog tenisera Milana Ristova. Osvajanjem turnira Marko je već naredne sedmice svoj ranking na europskoj rang listi podigao i ušao u TOP 30 najboljih juniora Europe u konkurenciju U16. U kategoriji parova, sastali su se bosanskohercegovačko/hrvatska kombinacija Marko Maksimović/Antonio Voljavec i gruzijsko/srbijanski par Luka Januashvili/Nikola Jović. Gruzijsko/srbijanska kombinacija je bila bolja i pobijedila. Kod juniorki pobjednica turnira u pojedinačnoj konkurenciji je Ukrajinka Anastasiia Firman. Ukrajinska igračica je u finalnom meču pobijedila Slovačku teniserku Karolinu Krajmer. Osim učesnika i učesnica iz devetnaest zemalja svijeta na turniru su učestvovali igračice i igrači iz Bosne i Hercegovine. Devetnaest juniora i osam juniorki predstavljalo je Bosnu i Hercegovinu igrajući na međunarodnom teniskom turniru u kategoriji U16 iz kalendara Tennis Europe I kategorije " OPEN RCT Barcelona 1899 – Sarajevo 2021". Treba naglasiti da turnir u svom nazivu nosi imena dvojice utemeljitelja i vizionara ovog turnira Sarajlije Namika Terzimehića i građanina Barcelone Juana Marie Tintore Turulla, koji na žalost više nisu sa nama.

Za realizaciju manifestacije odobrena su sredstva iz Budžeta Grada Sarajeva u iznosu od 3.000,00 KM.

MEĐUNARODNI TURNIR U SJEDEĆOJ ODBOJCI „SARAJEVO OPEN 2021“

Termin: 01.-03.10.2021. godine. Mjesto održavanja: KSC „Ramiz Salčin“ Mojnilo. Organizator: OKI „FANTOMI“. Pod pokroviteljstvom Grada Sarajeva održan je XX Međunarodni turnir u sjedećoj odbojci „SARAJEVO OPEN 2021“. Na turniru je učestvovalo osam ekipa (oko 120 invalidnih osoba) i to: reprezentacija Hrvatske, te ekipe: SDI „Hrabri“ Zagreb-Hrvatska, OKI „Feniks“ Kikinda-Srbija, IOK „Borac“ Banja Luka, OKI „Doboj“, IOK „Jedinstvo-Biće“ Brčko, KSO „Zenica '92“ i OKI „FANTOMI“ Sarajevo. Zbog koronavirusa, turniru nisu prisustvovali gledaoci, ali svi planirani ciljevi turnira su u potpunosti realizirani. U okviru turnira „SARAJEVO OPEN 2021“ još jednom je skrenuta pažnja na opasnost od zaostalih mina i NUS-a i svi učesnici turnira su upoznati da je završen projekt „SARAJEVO BEZ MINA 2021“, projekat koji je podržao

ITF. Najuspješnija ekipa turnira je OKI „Fantomi“ koja je u finalu pobijedila ekipu KSO „Zenica '92“ iz Zenice. Poseban akcenat u medijskoj prezentaciji i samom održavanju turnira data je na važnost uključivanja osoba sa invaliditetom u sport i prezentaciju sjedeće odbojke kao sporta i najboljeg načina rehabilitacije i resocijalizacije lica sa tjelesnim oštećenjima.

Za realizaciju manifestacije odobrena su sredstva iz Budžeta Grada Sarajeva u iznosu od 3.000,00 KM.

MEĐUNARODNO SKIJAŠKO TAKMIČENJE „DJECA ZA MIR U SVIJETU“

Termin: 21-24.02.2021. godine. Mjesto održavanja: Bjelašnica. Organizator: Sarajevski skijaški klub „SARAJEVO“. Pod pokroviteljstvom Grada Sarajeva održano je takmičenje FIS KUP „Djeca za mir u svijetu“ 2021., u alpskom skijanju za djecu do 14 i do 16 godina. Riječ je o jednom od 11 dječjih takmičenja registrovanih u kalendaru Međunarodne skijaške federacije (FIS), koja se održavaju u svijetu svake godine. Tokom posljednjih 20 godina na ovoj utrci učešće su uzeli timovi iz 20 zemalja regije i svijeta. Na takmičenju 2021. godine učestvovalo je 107 takmičara iz trinaest država (Bosna i Hercegovina, Argentina, Crna Gora, Češka, Grčka, Hrvatska, Mađarska, Rumunija, Srbija, Slovenija, Slovačka, Makedonija i Turska). Kategorije u kojima su se djevojčice i dječaci takmičili su bile: slalom, veleslalom, super G.

Za realizaciju manifestacije odobrena su sredstva iz Budžeta Grada Sarajeva u iznosu od 2.000,00 KM.

MEĐUNARODNO FIS TAKMIČENJE U SNOWBOARDU „EUROPA KUP SARAJEVO“

Termin: 29-30.01.2021. godine. Mjesto održavanja: Bjelašnica – Štinji do. Organizator: Snowboard klub „Free Style“. Na Evropa Kupu Sarajevo 2021, nastupilo je 20 takmičara iz dvije države. Također je po prvi put organizovano i zvanično FIS snowboard takmičenje u dječjoj kategoriji, gdje je učestvovalo 10 djevojčica i dječaka iz Bosne i Hercegovine i Hrvatske.

Za realizaciju manifestacije odobrena su sredstva iz Budžeta Grada Sarajeva u iznosu od 2.500,00 KM.

MEĐUNARODNI TURNIR U FUDBALU U-17 „IGRAJ FUDBAL ŽIVI ŽIVOT“

Termin: 11-13.08.2020. godine. Mjesto održavanja: Stadion „Otoka“ Novi Grad i Centar za edukaciju, sport i rekreaciju „Safet Zajko“. Organizator: Udruženje „Profesional“. Na turniru je nastupilo osam kadetskih ekipa samo iz Bosne i Hercegovine, zbog situacije uzrokovane pandemijom COVID - 19. Pravo nastupa na takmičenju su imali igrači rođeni 2005. godine. Svojom organizacijom turnir je do sada unaprijedio odnose među klubovima iz regiona, a veliki broj djece je animirao da se bave sportom, što je bio i jedan od ciljeva. Također, treba naglasiti da su prethodnih godina, između ostalih, na ovom događaju učestvovali Tin Jedvaj, hrvatski reprezentativac i aktuelni član Augsburga, Marko Grujić, srbijanski reprezentativac i aktuelni član Porta, kao i Andrej Đokanović, Vladan Kovačević, Selmir Pidro – aktuelni članovi FK Sarajevo. Turnir je osvojila ekipa FK Sarajevo, nakon pobjede u finalu nad ekipom iz Širokog Brijega. Finalni meč je sudio poznati bh. sudija Irfan Peljto. U utakmici za treće mjesto Sloboda je savladala Željezničar rezultatom 2:0 golovima Mujića i Beganovića. Za najboljeg igrača proglašen je Bakir Nurković (Sarajevo). Najbolji strijelac turnira je Lazar Stjepić (Slavija) sa četiri pogotka. Za najboljeg golmana proglašen je Arman Šutković (Sarajevo). Treba istaći još jednom da je turnir do početka pandemije imao međunarodni karakter.

Za realizaciju manifestacije odobrena su sredstva iz Budžeta Grada Sarajeva u iznosu od 2.000,00 KM.

MEĐUNARODNI SKOKOVI U VODU „BENTBAŠA“

Termin: 07.08.2021. godine. Mjesto održavanja: Bentbaša. Organizator: Udruženje za promociju sporta i turizma „SporTur“. Na ovom sportsko-turističkom događaju, koji je postao prepoznatljiv brend Grada Sarajeva, nastupilo je 13 takmičara iz Srbije, Crne Gore i Bosne i Hercegovine. Prvo

mjesto je osvojio Evlad Krnjić, drugo mjesto pripalo je Draganu Milnoviću iz Užica, a treće mjesto je osvojio Rade Šćepanović iz Kolašina. Zbog pandemije koronavirusa organizatori nisu bili u situaciji da pozivnice upute takmičarima iz drugih dijelova svijeta. Bentbaša je postala svjetski poznata destinacija za ovaj vid ekstremnog sporta, što ujedno promovira Grad Sarajevo i BiH. Takmičenje se održava od 2015. godine.

Za realizaciju manifestacije odobrena su sredstva iz Budžeta Grada Sarajeva u iznosu od 3.000,00 KM.

SPORTSKE IGRE MLADIH

Termin: 30.04.-04.07.2021. godine. Mjesto održavanja: 45 bh. gradova – Srebrenica, Sanski Most, Ključ, Bihać, Bužim, Velika Kladuša, Ljubuški, Jablanica, Konjic, Trebinje, Široki Brijeg, Mostar, Banovići, Živinice, Tuzla, Srebrenik, Gračanica, Gradačac, Brcko, Jajce, Travnik, Novi Travnik, Sarajevo, Bratunac, Zvornik, Kakanj, Zenica, Bugojno, Maglaj, Doboje, Lukavac, Bijeljina, Gornji-Vakuf, Zavidovići, Čitluk, Čapljina, Orašje, Obudovac, Tešanj, Visoko, Olovo, Odžak, Stolac, Breza i Milići. Veliko finale: Sarajevo (06.-08.07.2021. godine) Organizator: Udruženje za sport i rekreaciju mladih. Na Veliko finale u Sarajevo je doputovalo više od 710 učesnika, pobjednika regionalnih i polufinalnih takmičenja. Zbog situacije sa pandemijom COVID - 19 i zbog preporuka nadležnih zdravstvenih institucija broj finalista je bio smanjen kako bi se ispoštovale sve mjere. U 2021. godini, Sportske igre mladih su proslavile 25. godina postojanja u regiji, a jubilej je obilježen u Splitu u sklopu Međunarodnog finala Sportskih igara mladih. Program je obuhvatio svečanu akademiju, a završen je utakmicom između Ambasadora Igara i SIM učesnika. U ekipi Ambasadora nastupili su predsjednik UEFA-e g. Aleksandar Čeferin, te zvijezde svjetskog nogometa – Luis Figo, Predrag Mijatović, Zvonimir Boban, Fernando Hierro, Maxwell, Malouda i mnogi drugi. Medijsku kampanju je pratilo 8 nacionalnih, 2 regionalne i 21 lokalna stanica, te više od 80 radio stanica u Bosni i Hercegovini, čime se može zaključiti da je isticanje značaja grada Sarajeva u podršci realizacije ovog događaja vjerovatno i premašilo očekivanja.

Za realizaciju manifestacije odobrena su sredstva iz Budžeta Grada Sarajeva u visini od 5.000,00 KM.

SPORTSKE IGRE OAZE

Termin: 27.-30.09.2021. godine. Mjesto održavanja: Sarajevo. Organizator: Udruženje „OAZA“. Sportske igre OAZE je takmičenje međunarodnog karaktera koje je okupilo oko 550 takmičara iz Bosne i Hercegovine i regiona, koji su se na sportskim terenima borili za medalje u sedam sportova: plivanje, nogomet, košarka, atletika, stolni tenis, boćanje, i MATP — program za osobe sa višestrukim smetnjama.

Za realizaciju manifestacije odobrena su sredstva iz Budžeta Grada Sarajeva u visini od 1.000,00 KM.

MEĐUNARODNI KUGLAČKI TURNIR ZA SLIJEPE „SARAJEVO 2021“

Termin: 09-10.04.2021. godine. (pomjereno i održano 29.05.2021.) Mjesto održavanja: Kuglana „Zetra“. Organizator: Sportsko društvo slijepih i slabovidnih KS. Povodom Dana grada Sarajeva, u kuglani „Zetra“, održan je 12. Međunarodni kuglački turnir za slijepe „Sarajevo 2021“. Uvažavajući propisane epidemiološke mjere koje su limitirale broj učesnika u zatvorenom prostoru, te je učestvovalo znatno manje takmičara nego prethodnih godina. Na turniru je nastupio 31 kuglač i kuglačica iz 8 ekipa (Subotice, Novog Sada, Beograda, Visokog, Banja Luka i Sarajeva). Ekipno prvo mjesto je osvojila ekipa SD SIS KS 1, drugo mjesto ekipa VID Banja Luka, treće mjesto SD SIS KS 2. U pojedinačnoj konkurenciji bilo je šest kategorija tri muške i tri ženske kategorije. Najuspješniji su bili kuglači iz Sarajeva koji su osvojili pet zlatnih medalja.

Za realizaciju manifestacije odobrena su sredstva iz Budžeta Grada Sarajeva u visini od 4.000,00 KM.

MEĐUNARODNI KOŠARKAŠKI TURNIR

Termin: 09-11.04.2021. godine. (pomjeren i održan turnir 28-30.05.2021.) Mjesto održavanja: Centar Skenderija. Organizator: Košarkaški klub „Koš“. Na ovogodišnjem turniru učestvovala su po četiri ekipe iz četiri zemlje Hrvatske, Srbije, Crne Gore i Bosne i Hercegovine u kategorijama pionira i kadeta. U kadetskoj konkurenciji pobijedila je ekipa KK Partizan iz Beograda, drugo mjesto osvojila je ekipa domaćina KK KOŠ, a treće mjesto pripalo je ekipi KK Zadar. Proglašena je i najbolja petorka turnira Ajdin Bećirović – KK Koš, Belmin Avdić – KK Koš, Roko Lukić – KK Zadar, Aleksa Milenković – KK Partizan i Vasilije Todorović – KK Studentski centar. Najkorisniji igrač je bio Efe Tahmaz iz KK Partizan.

U konkurenciji pionira prvo mjesto osvojila je ekipa KK Zadar, drugo mjesto je osvojila ekipa KK Koš, a treće je pripalo ekipi KK Partizan. Najbolja petorka u ovoj konkurenciji bila je u sastavu Hamza Đedović – KK Koš, Ajdin Delić – KK Koš, Vice Grbić – KK Zadar, Mladen Milićević – KK Partizan, Bakir Dedović – KK Spars. Za najkorisnijeg igrača proglašen je Toni Torbarina iz KK Zadar. Takmičenje je otvorio zamjenik gradonačelnice Haris Bašić.

Za realizaciju manifestacije odobrena su sredstva iz Budžeta Grada Sarajeva u visini od 7.000,00 KM.

TURNIR U STRELJAŠTVU ZA OSOBE SA INVALIDITETOM

Termin: 27.03.2021. godine (pomjeren i održan 17.04.2021.) Mjesto održavanja: Streljana „Zetra“ Organizator: Streljački savez invalidnih lica FBiH. U povodu 6. aprila - Dana grada Sarajeva, a u organizaciji Streljačkog saveza osoba sa invaliditetom Federacije Bosne i Hercegovine na strelištu Zetra, održan 18. Tradicionalni šestoaprilski turnir u streljaštvu za osobe sa invaliditetom. Učestvovalo je 8 ekipa sa preko 60 strijelaca iz Sarajeva, Zenice, Tuzle, Maglaja, Tešnja, Banovića i Živinica. Strijelci su se takmičili u ekipnoj i pojedinačnoj konkurenciji i postigli zapažene rezultate. U ekipnom plasmanu prvo mjesto osvojila je ekipa SIK Tuzla sa 534 kruga, drugo mjesto pripalo je SK OSI Novi Grad Sarajevo sa 502 kruga, a treće SKOSI Tešanj sa 455 krugova. Zlatne medalje po kategorijama invalidnosti osvojili su Šaban Fatić, Ervin Bejdić i Fahrudin Mujić. U ekipnoj konkurenciji kod žena ekipa SKOSI Živinice je osvojila prvo mjesto sa 358 krugova, drugo mjesto je osvojila ekipa SKOSI Zenica sa 334 kruga, a treće mjesto pripalo je ekipi SIK Tuzla sa 309 krugova. Zlatne medalje po kategorijama invalidnosti osvojile su Rasma Beganović, Safeta Jagodić i Zerina Skomorac.

Za realizaciju manifestacije odobrena su sredstva iz Budžeta Grada Sarajeva u visini od 1.500,00 KM.

MEĐUNARODNI HRVAČKI TURNIR „KUP GRADA SARAJEVA 2021“

Termin: 03.04.2021. godine. (pomjeren i održan 16-17.10.2021.) Mjesto održavanja: Dvorana R, Organizator: Hrvачki klub „Bosna“. Na turniru je nastupilo je 116 takmičara iz Slovenije, Srbije, Hrvatske, Crne Gore i naše zemlje. Nakon 136 borbi pobjednik ovog turnira je bio Hrvачki klub „Bosna“ Sarajevo. Od stranih ekipa najuspješnija je bila ekipa „Radnički“ iz Sombora. Najuspješniji domaći takmičar je Affan Smajić. Najuspješniji strani takmičar Ivan Bedeković, HK „Vindija“ iz Varaždina, a najuspješnija takmičarka je bila Leda Ećimović RK „Dinamo“ iz Pančeva. Najbolji mladi takmičari bili su Hana Brkanić kod djevojčica te Bakir Gobeljić kod dječaka, a oboje su članovi HK „Bosna“. Takmičenje je otvorio predsjedavajući Gradskog vijeća Jasmin Ademović.

Za realizaciju manifestacije odobrena su sredstva iz Budžeta Grada Sarajeva u visini od 4.000,00 KM.

MEĐUNARODNI ŠESTOAPRILSKI TURNIR U STRELJAŠTVU

Termin: 02-04.04.2021. godine. (pomjeren i održan 18-19.09.2021.) Mjesto održavanja: Streljana „Zetra“. Organizator: Streljački klub "Sarajevo. Takmičenje se održalo prema pravilima Svjetske streljačke federacije uz organizaciju finalnih gađanja. Gađalo se na elektronske mete, a sama

organizacija je protekla bez bilo kakvih problema. Pored domaćih sudija, na takmičenju su sudile i međunarodne sudije iz zemalja učesnica. U pojedinačnoj konkurenciji kod žena prvo mjesto osvojila je Segmedina Bjelošević takmičarka SK Sarajevo, drugo mjesto Krstina Stojanović iz SD Crvena Zvezda iz Srbije, a treće Almedina Arnautović SSK Željezničar. U ekipnoj konkurenciji najbolje su bile domaće takmičarke. Seniorska ekipa Streljačkog kluba Sarajevo je osvojila prvo mjesto ispred ekipe juniorki SK Sarajevo, dok je treće mjesto osvojila ekipa SD Crvena Zvezda iz Srbije. Pobjednici turnira kod seniora puškom su domaći takmičari SK Sarajevo. Nedžad Fazlija je osvojio prvo, Nikola Ćorić drugo, a Nedžad Džanković treće mjesto.

U ekipnoj konkurenciji takmičari Streljačkog kluba Sarajevo bili su ubjedljivi osvojivši prvo i drugo mjesto, dok je ekipi SK Visoko pripalo treće mjesto. U disciplini zračni pištolj pobjednik turnira je Belmin Mešanović iz SK Visoko, dok su Anes Krečo, SK Sarajevo i Ivan Slijepčević, SK Mladost, osvojili drugo odnosno treće mjesto. U ekipnoj konkurenciji prvo mjesto osvojila je ekipa SK Sarajevo, drugo mjesto pripalo je ekipi SK Visoko, dok je treća bila ekipa SK Mladost. Bilten sa takmičenja je prosljeđen Svjetskoj streljačkoj federaciji i Evropskoj streljačkoj konfederaciji. Bilten je objavljen na stranici Evropske streljačke konfederacije.

Za realizaciju manifestacije odobrena su sredstva iz Budžeta Grada Sarajeva u visini od 5.000,00 KM.

MEĐUNARODNI VELEMAJSTORSKI ŠAHOVSKI SUPER TURNIR „BOSNA“ SARAJEVO 2021

Termin: 09-12.12.2021. godine. Mjesto održavanja: Prostorije Šahovskog kluba „Bosna“, Sarajevo. Organizator: Šahovski klub „Bosna“ Sarajevo. Na turniru je nastupilo 70 igrača iz naše države, Srbije, Hrvatske, Crne Gore i Turske. Učešće je uzelo 19 kadetkinja i kadeta. Treba istaknuti da je ŠK „Bosna“ organizator međunarodnog turnira još od 1960. godine i poslije Vijk aan Zea u Holandiji, turnir u Sarajevu ima najdužu tradiciju na svijetu. Na Balkanu je godinama najjači šahovski turnir ubjedljivo.

Za realizaciju manifestacije odobrena su sredstva iz Budžeta Grada Sarajeva u visini od 3.000,00 KM.

MEMORIJALNI BOKSERSKI TURNIR „BRAĆA KADIĆ“ 2021

Termin: 25.12.2021. Mjesto održavanja: Kulturni Centar Kralj Fahd – Novi Grad. Organizator: Klub borilačkih sportova „Braća Kadić“. Kako je navedeno u izvještaju, KBS „Braća Kadić“, radi zauzetih termina u kalendaru i samog rasporeda u takmičarskoj sezoni, organiziran je turnir u taekwondou, između četiri sarajevska kluba (TK Novi Grad, TK Ilidža, TK Vogošća i TK Centar). Radi zaštite od pandemije COVID19, i instrukcije zaposlenih iz KC Kralj Fahd, ulaz je bio ograničen gledateljima u dvorani. Iako nije bilo borbi u boksu i kimboksu, na manifestaciji je upriličeno uručenje za najboljeg boksera dosadašnjih turnira, a koji su se održali u zadnje 4 godine. Priznanje je dobio Adem Fetahović iz BK Ilidža, reprezentativac BiH. Priznanje za najboljeg kimboksera dobio je Haris Biber, također reprezentativac BiH. Najboljim taekwondoistom je proglašen sportista Nedžad Husić, koji je na Olimpijskim igrima zauzeo visoko 5. mjesto. Najbolim trenerom je proglašen Haris Husić. Nakon dodjela nagrada, održane su borbe kadeta i juniora u taekwondou, te osam borbi u seniorskoj i 4 para borbi u juniorskoj kategoriji. Najmlađi pobjednik turnira je Ahmed Šabanija (TK Novi Grad). Za najborbeniji par su proglašeni Amna Handžić (TK Vogošća) i Sara Džafić (TK Ilidža). Najbolji tehničar na turniru je Amina Hajdarpašić (TK Centar). Manifestacija je trajala dva sata.

Za realizaciju manifestacije odobrena su sredstva iz Budžeta Grada Sarajeva u ukupnom iznosu od 3.000,00.

SARAJEVSKI POLUMARATON – „VIVIA RUN FEST SARAJEVO 2021“

Termin: 18-19.09.2021. godine. Mjesto održavanja: Sarajevo. Organizator: Udruženje za promociju sporta i razvoja „Marathon“ Sarajevo. Run fest Sarajevo 2021. održan je kao javni sportski i turistički

dogadjaj sa razvojnom, edukacijskom i promocijskom ulogom i okupio je veliki broj učesnika, kako profesionalnih sportaša tako i građana koji se rekreativno/amaterski bave sportom. Manifestacija je okupila preko 1000 učesnika iz Bosne i Hercegovine, Europe i svijeta i uključivala je realizaciju tri trke popraćene zabavnim sadržajem za sve generacije te se u kontekstu ostalih gradskih i državnih sportskih dešavanja pozicionirala kao pravi festival trčanja, druženja, promovisanja zdravog života i pozitivnih vrijednosti. Učestvovali su trkači i 36 zemalja. Centralni događaj Sarajevo Run Fest-a je bila polumaratonska trka u okviru koje je održano i Državno prvenstvo u polumaratonu. Start utrke je bio na mjestu turističkog srca grada, u ulici Ferhadija (znak Sarajevo Meeting of Cultures) 19. septembra, sa početkom u 9:00 sati, a cilj je bio Pozorišni trg Susan Sontag. Pobjednici 14. Sarajevo polumaratona, u ženskoj konkurenciji je bila Olivera Jevtić sa vremenom od 1:17:38, dok u muškoj konkurenciji je slavio Stenli Kipruto sa vremenom od 1:08:30. Pobjednici državnog prvenstva u polu maratonu, u ženskoj konkurenciji: Lucia Kimani, vrijeme: 1:28:51, a u muškoj Emir Hastor, vrijeme: 1:12:46. Svi učesnici i posjetioci festivala svoj boravak u Sarajevu su upotpunili organiziranim obilaskom grada uz pratnju certificiranog turističkog vodiča. Za realizaciju manifestacije odobrena su sredstva iz Budžeta Grada Sarajeva u ukupnom iznosu od 6.000,00.

IV FINANSIRANJE OD STRANE GRADA SARAJEVA U 2021. GODINI

U segmentu podrške sportskim manifestacijama od posebnog interesa za Grad, a nakon provedene procedure, u 2021. godini sufinansirani su sljedeći projekti:

	Manifestacija	Organizator	Iznos
1	Međunarodni memorijalni judo turnir „Vinko Šamarlić“	Judo klub „Željezničar“	3.000,00
2	Međunarodni memorijalni turnir u dizanju tegova „Andrija Maleč“	Klub dizača tegova „Željezničar“ Sarajevo	2.000,00
3	Međunarodni memorijalni bokserski turnir „Mustafa Hajrulahović Talijan“	Bokserski klub „Zlatni ljiljani“	3,000,00
4	Memorijalni bokserski turnir „Braća Kadić“	Klub borilačkih sportova „Braća Kadić“	3.000,00
5	Međunarodni teniski turnir za juniore-ke do 16 godina „Open RCT Barcelona 1899-Sarajevo“	Teniski klub „Tenis Pro“	3,000.00
6	Međunarodni velemajstorski šahovski super turnir „Bosna“ Sarajevo	Šahovski klub „Bosna“	3.000,00
7	Međunarodni turnir u sjedećoj odbojci „SARAJEVO OPEN“	OKI „Fantomi“	3.000,00
8	Međunarodno skijaško takmičenje FIS Kup "Djeca za mir u svijetu"	Sarajevski skijaški klub „SARAJEVO“	2.000,00
9	Međunarodno FIS takmičenje u snowboardu „Europa KUP Sarajevo“	Snowboard klub „Free Style“	2.500,00
10	Šestoaprilski turnir u hrvanju „Kup grada Sarajeva“	Hrvački klub „Bosna“	4.000,00
11	Međunarodni Šestoaprilski turnir u kuglanju za slijepe i slabovidne osobe	Sportsko društvo slijepih i slabovidnih KS	4.000,00

12	Međunarodni Šestoaprilski turnir u streljaštvu	Streljački klub „Sarajevo“	5.000,00
13	Međunarodni Šestoaprilski turnir u košarci	Košarkaški klub „Koš“	7.000,00
14	Sarajevski polumaraton	Udruženje za promociju sporta i razvoja „Marathon“ Sarajevo	6.000,00
15	Međunarodni fudbalski turnir U-17 „Igraj fudbal živi život“	Udruženje „Profesional“	2.000,00
16	Međunarodni skokovi u vodu "Bentbaša"	Udruženje za promociju sporta i turizma „SporTur“	3.000,00
17	Šestoaprilski turnir u streljaštvu za invalide	Streljački savez invalidnih lica FBiH	1.500,00
18	Sportske igre mladih	Udruženje za sport i rekreaciju mladih	5.000,00
19	Sportske igre Oaze	Udruženje „OAZA“	1.000,00

U 2021. godini za primjenu Odluke o finansiranju sportskih manifestacija od interesa za Grad bio je predviđen iznos od 100.000,00 KM.

Organizatori gore navedenih manifestacija su u 2021. godini dostavili narativne i finansijske izvještaje sa informacijama o načinu utroška dodijeljenih finansijskih sredstava, kao i o posjećenosti i rezultatima sa takmičenja. Dostavljene informacije su najbolji pokazatelji da su manifestacije koje sufinansira Grad Sarajevo vrhunske kvalitete te da okupljaju mnogobrojne sportiste iz BiH i Evrope te sve veći broj posjetilaca.

V ZAKLJUČCI

Grad Sarajevo je u 2021. godini, provodeći Odluku o utvrđivanju i načinu sufinansiranja sportskih manifestacija od posebnog interesa za Grad, a u skladu sa planiranim sredstvima, podržao sve sportske manifestacije koje su se održale.

Provodeći Odluku o utvrđivanju i načinu sufinansiranja sportskih manifestacija od posebnog interesa za Grad uspjeli smo, i pored nepovoljne epidemiološke situacije, sačuvati kontinuitet održavanja određenog broja programskih sadržaja u okviru navedenih manifestacija.

Grad Sarajevo, provodeći Odluku o sportskim manifestacijama, omogućuje da veliki broj građana našeg grada, a posebno djece i mladih u toku cijele godine budu neposredni sudionici različitih međunarodnih sportskih sadržaja koji iz godine u godinu dobivaju na masovnosti, a posebno kvaliteti. Grad Sarajevo, kao olimpijski i sportski grad, će i ubuduće ulagati napore da sufinansira i podržava razne sportske sadržaje kako bi se na taj način animirali građani, posebno djeca i mladi, da prate sadržaje ovih sportskih manifestacija te da se i sami uključe u rad sportskih udruženja.